

Powšitkowne WOZJEWJENJA

njedźelu, 4. oktobra 2015

Oratorij „Žně“ w Budyskej serbskej cyrkwi

W cyrkwi Našeje lubeje Knjenje w Budyšinje zaklinči domchowanku, tutu njedźelu 4. oktobra, we 18.00 hodź. oratorij „Žně“ wot Korle Awgusta Kocora na tekst Handrija Zejlerja. Pod nawodom dirigenta Gabriela Doná spěwaja chór Serbskeho ludoweho ansambla a Praski chór „Coro di Praga“, solisća Elmira Yakhina (sopran), Mira Szary (alt), Mikołaj Walerych (tenor) a Jae-Hyung Cho (bariton). Přewod na klawěrje přewozmje Liana Bertók. Wšitcy su wutrobnje přeprašeni. Zastup je darmotny, wo kolektu so prosy.

Zapokazanje noweho Radworskeho fararja

Farar Beno Jakubaš je wot 1. oktobra za Radworskeho fararja pomjenowany. Swjatočne zapokazanje fararja Jakubaša budže srjedu, 7. oktobra, we 18 hodź. na Božej mši w Radworskej farskej cyrkwi. Wšitcy su wutrobnje přeprašeni.

Swjećacy biskop z Tansanije porěči w Chrósćicach

W zwisku ze zahajenjom lětušeje akcije biskopskeho pomocneho skutka missio w Drježdžansko-Mišnjanskim biskopstwje přińdu hosćo tež do Chrósćic. Přichodny pjatk, 9. oktobra, w 17.30 hodź. porěči tam na farje mjez druhim swjećacy biskop Method Kilaini z Tansanije wo položenju křesćanow w swojim kraju a rozloži, kak so srědki z Němskeje nałoža. K tomu su wšitcy přeprašeni. – Z Božej mšu njedźelu, 11. oktobra, w 10.30 hodź. w Drježdžanskej katedrali so lětuša akcija pomocneho skutka missio zahaji. Tež k tomu su wěriwi přeprašeni.

Dny za džědow a wowki z wnučkami

Smochčanski Dom biskopa Bena přeprašuje džědow a wowki ze swojimi wnučkami na zhromadne dny pod hesłom „Štóz so na Boha spušća“. Tute wotměja so tam w druhim prózdnim tydženju wot pónđzele do pjatka, 19. do 23. oktobra. Někotre městna su hišće swobodne. Dalši tajki tydžeń přewjedže so w klětušich zymskich prózdninach wot pónđzele do pjatka, 15. do 19. februara 2016. Zajimcy měli so pod telefonowym čisłom (03 59 35) 2 23 16 abo z mailku pod paedagogik@benno-haus.de přizjewić.

Kubłanski dzeń za 7. a 8. lětnik

Pod hesłom „Derje je, zo mam přećela – wo lubosći a tajkich wěcach“ přeprašuje dekanatne dušepastyrstwo šulerki a šulerjow 7. a 8. lětnika sobotu, 10. oktobra, wot 9 do 16 hodź. do Don Boskoweho domu we Worklecach. Referentaj budžetaj na tutym polu wukubłanaj mandželskej Brücker z Drježdžan. Dalše informacije dóstanu zajimcy w interneće pod www.teen-star.de. Přizjewjenja přijimaja so hač do wutory, 6. oktobra, pod telefonowym čisłom (03 57 96) 8 87 07. Přinošk wučinja na wobdźělnika štyri eura.

Zhromadny dzeń za dźěci 3. a 4. lětnikow

Dekanatne dušepastyrstwo přeprašuje dźěci 3. a 4. lětnikow wutoru, 20. oktobra, wot 9 do 15 hodź. do Don Boskoweho domu we Worklecach. Zajimcy njech so prošu hač do štwórtka, 15. oktobra, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdźělnika přinošk, kotryž wučinja štyri eura.

Zhromadny dzeń za dźěci 1. a 2. lětnikow

Dekanatne dušepastyrstwo přeprašuje dźěci 1. a 2. lětnikow štwórtk, 22. oktobra, wot 9 do 15 hodź. do Don Boskoweho domu we Worklecach. Zajimcy njech so prošu hač do štwórtka, 15. oktobra, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdźělnika přinošk, kotryž wučinja štyri eura.

Zetkanje Krupčanskich putnikow

Wšitkich, kotřiž su lětsa pěši do Krupki putnikowali, přeprašuje farar Gabriš Nawka na zetkanje z wječerju do Chróscic na faru. Tute zahaji so pjatk, 16. oktobra, z wječornymi kemšemi, kotrež su w 19.00 hodź.

Eksercicije w Drježdžanskim Domje Wysoke duby

Dny rozpominanja a modlenja wotměja so wot pjatka, 30. oktobra, we 18 hodź. hač do nje-dzele, 1. nowembra, w 10 hodź. w eksercicijnym Domje Wysoke duby w Drježdžanach. Jezuitski pater Willi Lambert je k temje „Z wutroby žiwy być – Haj k Lětu smilnosće“ pře-wjedže. Wón budže w němskej rěči přednošować, modlitwy a kěrluše budu serbske. Dny rozpominanja maja wěriwym pomhać, z duchownymi impulsami, wosobinskim modlenjom, rozmołwu a Božej mšu žro Jězusoweho ewangelija spóznać. Přizjewić měli so zajimcy w Chróscicach na farje, telefonowe čisło (03 57 96) 8 04 00, w Haus HohenEichen, Dresdnerstr. 73, 01326 Dresden, telefonowe čisło (03 51) 2 61 64 10 abo z mailku na info@haus-hoheneichen.de.

Putniska jězba do Mariazella

Za putnisku jězbu wot pónđzele do soboty, 12. do 17. oktobra, do Mariazella w Awstriskej móžeja so hišće zajimcy přizjewić. Přenocowanje je stajnje w Mariazellu. Jězba powjedže tež k benediktinskimaj klóštromaj Melk a Admont. Zapřijata je tohorunja parnikowa jězba po luboznej krajinje Wachau. Přizjewić móžeće so pola Šmitec w Radworju, telefonowe čisło (03 59 35) 28 60.

T. Kubašec

